


Los ntawm Thawj Tswj Hwm
Dieter F. Uchtdorf

Tus Pab Cuam thib Ob hauv
Thawj Pawg Thawj Tswj Hwm



Tom Qab Hlub, Ces Yuav Ua Dab Tsi?

Peb tus yaj saub uas peb hlob, Thawj Tswj Hwm Thomas S. Monson, tau qhia hais tias, “kev hlob yog lub hauv paus rau txoj moo zoo.”¹

Kev hlob yeej tseem ceeb heev, Yexus thiaj hais tias yog “txoj lus txib thib ib thiab tseem ceeb tshaj” thiab hais tias yog lub hauv paus ntawm txhua txoj kev cai thiab cov yaj saub tej lus tag nrho.²

Kev hlob yog lub hauv paus rau txhua yam peb ua nyob hauv lub Koom Txoos. Txhua lub txheej xwm, txhua kev sib ntsib, txhua yam peb ua vim peb yog Yexus Khetos cov pab coj mas yuav tsum muaj txoj kev hlob ua xwb—vim yog tsis muaj kev siab hlob, “Khetos txoj kev hlob dawb paug,” peb tsis muaj nqi dab tsi.³

Thaum peb to taub qhov no kawg siab kawg ntsws, thaum peb tshaj tawm hais tias peb hlob Vajtswv thiab peb cov neeg zej zog—ces yuav ua dab tsi?

Qhov uas peb muaj kev khuav leej thiab kev hlob rau lwm tus puas txaus lawm? Puas yog peb ua raws li Vajtswv hais yog peb tshaj tawm hais tias peb hlob Vajtswv thiab peb cov neeg zej zog xwb?

Zaj Lus Piv Txwv Txog Ob tug Tub

Nyob hauv lub tuam tsev hauv Yeluxalees, cov pov thawj thiab cov txwj laug ntawm cov neeg Yudais tuaj rau Yexus kom ntxias Nws hais lus tsis yog. Tiam sis, tus Cawm Seej tsis raug lawv ntxias thiab hais ib zaj dab neeg rau lawv.

Nws pib hais tias, “Muaj ib tug txiv neej muaj ob tug tub.” Leej txiv mus rau tus tub hlob thiab hais kom nws ua hauj lwm nyob hauv lub vaj txiv hmab. Tiam sis tus

tub ntawd tsis kam. Yav tom ntej, tus tub ntawd hloov siab lees txim, thiab tau mus.

Leej txiv mus rau tus tub thib ob thiab hais kom nws ua hauj lwm nyob hauv lub vaj txiv hmab. Tus tub thib ob ntawd hais tias nws mam li mus, tiam sis nws yeej tsis tau mus.

Ces tus Cawm Seej hais rau cov pov thawj thiab cov txwj laug thiab nug hais tias, “Ob tug tub no, tus twg yog tus uas mloog leej txiv lus?”

Lawv yuav tsum lees hais tias yog tus tub hlob—tus uas hais tias nws yuav tsis mus tiam sis tom qab ntawd hloov siab lees txim thiab mus ua hauj lwm hauv lub vaj txiv hmab.⁴

Tus Cawm Seej siv zaj dab neeg no qhia txog ib lub ntsiab cai tseem ceeb—cov uas ua raws li cov lus txib yog cov uas hlob Vajtswv tiag tiag.

Tej zaum yog vim li no Yexus thiaj hais kom cov neeg mloog thiab ua raws li cov Neeg Falixais thiab cov uas qhia Vajtswv txoj kev cai tej lus tiam sis tsis txhob ua raws li lawv tus yam ntxwv.⁵ Cov xib hwb no tsis tau ua raws li lawv hais. Lawv nyiam hais lus txog kev teev ntuj, tiam sis lawv tsis to taub lub ntsiab.

Tej Yam Peb Ua thiab Peb txoj Kev Cawm Seej

Nyob hauv ib zaj lus kawg uas tus Cawm Seej hais rau Nws cov pab coj, Nws hais rau lawv txog Kev Txiaiv Txim kawg. Yuav muab cov phem thiab cov ncaj ncees sib nrug. Cov zoo yuav tau txoj sia nyob mus ib txhis; cov phem yuav raug txim mus ib txhis.

Ob pawg no sib txawv li cas?

Cov uas ua tej yam qhia tias lawv hlub lwm tus tau kev cawm seej. Cov uas tsis ua li ntawd raug txim.⁶ Yeej pom tau qhov uas peb hloov siab los ntseeg Yexus Khetos txoj moo zoo thiab kev cai thiab cov ntsiab cai tiag tiag los ntawm tej yam peb ua txhua hnuv.

Thaum kawg, qhov uas peb qhia hais tias peb hlub Vajtswv thiab cov neeg zej zog yeej yuav tsis ua rau peb tsim nyog txais kev tsa nto. Vim ib yam li Yexus qhia hais tias, “tsis yog txhua tus uas hu kuv hais tias, tus Tswv, tus Tswv, ces yuav tau mus Ntuj Ceeb Tsheej, tiam sis tsuas yog cov uas ua raws li kuv Txiv tus uas nyob saum ntuj lub siab nyiam, thiaj tau mus xwb.”⁷

Tom Qab Kev Hlub Yuav Ua Dab Tsi?

Lo lus teb lus nug “Tom qab kev hlub, ces yuav ua dab tsi?” yeej yooj yim to taub. Yog peb hlub tus Cawm Seej tiag tiag, peb muab peb lub siab npuab Nws ces peb ua raws li Nws cov pab coj. Thaum peb hlub Vajtswv, peb yuav siv zog ua raws li Nws cov lus txib.⁸

Yog peb hlub peb cov neeg zej zog tiag tiag, ces peb yuav siv zog pab “tej neeg pluag thiab tej neeg xav tau kev pab, tej neeg mob thiab tej neeg raug txom nyem.”⁹ Vim cov uas ua tej yam no los ntawm kev hlub tshua thiab kev xav pab lwm tus,¹⁰ cov ntawd yog Yexus Khetos cov pab coj.

Nov yog qhov uas muaj tom qab txoj kev hlub.

Nov yog lub ntsiab ntawm Yexus Khetos txoj moo zoo.

LUS CIM

1. Thomas S. Monson, “Kev Hlub—lub Hauv Paus rau txoj Moo Zoo,” *Liahona*, Tsib Hlis Ntuj 2014, 91.
2. Saib Mathais 22:36–40.
3. Saib Maulaunais 7:46–47.
4. Saib Mathais 21:28–32.
5. Saib Mathais 23:3.
6. Saib Mathais 25:31–46.
7. Mathais 7:21.
8. Saib Yauhas 14:15.
9. Lus Qhuab Qhia thiab Kev Khi Lus 52:40.
10. Saib Mauxiyas 18:8–9.

QHIA LOS NTAWM TSAB XOY NO

Thawj Tswj Hwm Uchtdorf hais tias Yexus Khetos cov pab coj tiag tiag yog cov uas qhia tias lawv hlub Nws thiab hlub lwm tus dhau los ntawm tej yam lawv ua. Nws qhia hais tias, “yog peb hlub tus Cawm Seej tiag tiag, peb muab peb lub siab npuab Nws ces peb ua raws li Nws cov pab coj.” Cia li xav seb puas xav nug cov uas koj qhia tias txoj kev hlub ua rau lawv taug txoj kev ua ib tug pab coj li cas. Tej zaum koj qhia lawv txog ib yam ntawm koj lub neej ib yam thiab. Tej zaum koj yuav xav caw lawv thov Vajtswv kom muaj kev siab hlub thiab lub dag zog hlub lwm tus.

COV HLUAS

Kev Ua Raws Li cov Lus Txib thiab Kev Hlub Lwm Tus

Thaum peb xav txog kev hlub, feem ntau peb xav txog kev saib movie txog kev sib hlub, cov khoom qab zib, thiab cov paj ua ntej. Tiam sis kev hlub—kev hlub *tiag tiag*—yeej tseem ceeb tshaj plaws thiab tsis qia dub npaum li ntawd. Yexus Khetos ua neej thiab tuag kom pab peb vim Nws hlub peb. Muaj tseeb tiag, ob lo lus txib tseem ceeb tshaj plaws yog hlub Vajtswv thiab hlub txhua tus (saib Mathais 22:36–40). Tiam sis peb yuav ua li cas *qhia* lwm tus tias peb hlub lawv?

Thawj Tswj Hwm Uchtdorf hais txog Yexus Khetos zaj lus piv txwv txog ob tug tub, ib tug uas ua hauj lwm rau nws leej txiv thiab ib tug uas tsis ua. Tus Cawm Seej qhia tias tus tub uas mloog nws leej txiv lus yeej hlub nws tiag tiag. Ib yam li ntawd, thaum peb mloog Vajtswv lus, peb qhia tias peb hlub Nws thiab xav rov qab mus cuag Nws.

Tiam sis peb yuav ua li cas qhia lwm tus hais tias peb hlub lawv? Thawj Tswj Hwm Uchtdorf piav hais tias: “Yog peb hlub peb cov neeg zej zog tiag tiag, ces peb yuav siv zog pab ‘tej neeg pluag thiab tej neeg xav tau kev pab, tej neeg mob thiab tej neeg raug txom nyem.’ Vim cov uas ua tej yam no los ntawm kev hlub tshua thiab kev xav pab lwm tus, cov ntawd yog Yexus Khetos cov pab coj.”

Yog li ntawd lwm zaum thaum koj pom koj niam, koj txiv, koj tus kwv tij nus muag, los sis ib tug phooj ywg, cia li xav seb yuav ua li cas pab lawv qhia tias koj xav li cas txog lawv. Koj ua li ntawd mas yuav ua rau koj thiab lawv zoo siab, tiam sis kuj yuav ua rau koj Leej Txiv Saum Ntuj Ceeb Tsheej zoo siab thiab.

COV ME NYUAM

Kev Qhia tias Peb Hlub Lwm Tus

Yexus hais ib zaj dab neeg txog ib leej txiv thiab nws ob tug tub. Leej txiv no ua hauj lwm hauv lub vaj txiv hmab thiab hais kom nws ob tug tub pab nws. Tus tub hlob hais tias nws tsis kam tiam sis tom qab ntawd nws hloov siab los pab hauv lub vaj txiv hmab. Tus tub thib ob hais tias nws mam li pab, tiam sis nws yeej tsis tau los pab. Yexus qhia hais tias tus tub hlob qhia tias nws hlub nws leej txiv vim nws mloog nws leej txiv lus.

Ua yeeb yam txog zaj dab neeg no! Ces sau ntawv los sis kos duab txog peb yam koj ua tau kom qhia tias koj hlub koj Leej Txiv Saum Ntuj Ceeb Tsheej.



**Kev Ntseeg,
Tsev Neeg, Kev Pab**

Kev Ua Niam Tsev Txiv Tsev Yog lub Luag Hauj Lwm Dawb Ceev

Ua tib zoo thov Vajtswv kawm tej yam no thiab nrhiav kev tshoov siab seb koj yuav tsum qhia dab tsi. Qhov uas koj to taub “Tsev Neeg: Ib zaj Lus Tshaj Tawm rau lub Ntiaj Teb” yuav ua li cas kom koj txoj kev ntseeg Vajtswv loj zuj zus thiab foom koob hmoov rau cov uas koj mus saib xyuas tom tsev? Kom tau ntaub ntauv xov xwm ntxiv, cia li txuas rau reliefsociety.lds.org.

Peb Leej Txiv Saum Ntuj Ceeb Tsheej txhim tsa tsev neeg kom pab qhia cov ntsiab cai zoo nyob hauv ib qho chaw uas muaj kev sib hlub. Thawj Tswj Hwm Thomas S. Monson hais tias: “Qhuas nej tus me nyuam thiab khawm nws; thiab hais tias, ‘Kuv hlub koj’ ntau dua; ua tib zoo ua tsaug rau nej cov me nyuam. Tsis txhob cia qhov teeb meem uas nej yuav kho rais los mus ua qhov tseem ceeb tshaj tus neeg uas yuav tsum hlub.”¹

Susan W. Tanner, Koom Haum Ntxhais Hluas tus tuam thawj tswj hwm dhau los, qhia hais tias: “Peb Leej Txiv Saum Ntuj yeej ua yam ntxwv txog tej yam peb yuav tsum ua. Nws hlub peb, qhia peb, ua siab ntev rau peb, thiab tso siab rau peb pub kev ywj siab xaiv rau peb. . . . Tej lub sij hawm peb xav tias kev qhuab ntuas, uas txhais hais tias, ‘kev qhia,’ yog kev cem. Cov me nyuam—thiab txhua leej txhua tus tsis hais cov laus cov hluas los yog—yuav coj zoo dua los ntawm kev hlub thiab kev txhawb nqa tshaj los ntawm kev nrhiav txhaum.”²

Txwj Laug Quentin L. Cook ntawm Pawg Kaum Ob tug Thwj Tim hais tias, “Yog peb rau siab muaj tsev neeg kev thov Vajtswv,

kawm vaj lug kub, tsev neeg hmo ua ke, cov koob hmoov pov thawj hwj, thiab kev hwm Hnub Caiv, peb cov me nyuam yuav paub tias, . . . yuav npaj muaj ib lub tsev saum ntuj ceeb tsheej, tsis hais lawv raug xwm txheej nyob hauv ib lub ntiaj teb nyuaj no.”³

Vaj Lug Kub Ntxiv

1 Nifais 8:37; 3 Nifais 22:13;
Lus Qhuab Qhia thiab Kev
Khi Lus 93:40; 121:41

Zaj Dab Neeg uas Muaj Sia

Txwj Laug Robert D. Hales los ntawm Pawg Kaum Ob tug Thwj Tim hais tias, “Ob peb xyoos tas los no kuv tab tom nyeem ntawv xov xwm thaum kuv ib tug xeeb ntxwv tau txav los ti ti kuv. Thaum kuv nyeem ntawv, kuv zoo siab hnov nws hais hais lus rau nws tus kheej. Ib pliag tom qab ntawd ua rau kuv xav tsis thoob thaum nws tshwm los nruab nrab ntawm kuv thiab ntawv xov xwm. Nws tuav kuv lub ntsej muag thiab nws muab nws lub qhov ntswg chwv kuv lub noog hais tias, ‘Yawg! Koj puas nyob?’

“. . . Qhov uas yus *nyob ntawd* txhais hais tias yus to taub peb cov

tub hluas ntxhais hluas lub siab thiab yus nrog lawv sib raug zoo. Thiab kev sib raug zoo tsis yog kev sib tham nrog lawv xwb tiam sis yuav tsum ua tej yam nrog lawv thiab. . . .

Peb yuav tsum npaj thiab siv tej lub cib fim qhia lawv. . . .

“. . . Thaum kuv laus zuj zus ua rau kuv haj yam to taub hais tias tej yam uas lwm tus qhia rau kuv thaum kuv yog ib tug tub hluas, qhov tseem ceeb yog kuv niam txiv tej lus qhia, tau pab kuv lub neej kom kuv rais los ua tus neeg no.”⁴

LUS CIM

1. Thomas S. Monson, “Love at Home— Counsel from Our Prophet,” *Liahona*, Yim Hli Ntuj 2011, 4.
2. Susan W. Tanner, “Did I Tell You . . . ?” *Liahona*, Tsib Hlis Ntuj 2003, 74.
3. Quentin L. Cook, “Tus Tswv Yog Qhov Kaj,” *Liahona*, Tsib Hlis Ntuj 2015, 64.
4. Robert D. Hales, “Our Duty to God: The Mission of Parents and Leaders to the Rising Generation,” *Liahona*, Tsib Hlis Ntuj 2010, 96, 95.

Xav Txog Qhov No

Vim li cas txoj kev zoo tshaj plaws qhia txoj moo zoo yog los ntawm kev hais lus thiab koj yam ntxwv txog kev hlub?